

Azaroak 17: Ikasleen Nazioarteko Eguna

Gaur, azaroak 17, Ikasleen Nazioarteko Eguna da. Azken urteotan bezala, Euskadiko Gazteriaren Kontseilutik, ikasle mugimenduak egindako lana azpimarratu eta gizarteratu nahi dugu. Manifestu honen bitartez hurrengo lerroetan jasotzen diren aldarrikapenak gizarteratu nahi ditugu:

- **Ikasteko espazioen egokitzapena**

Ikasleek ordu mordo eman ohi dituzte astean zehar zein aste-bukaeretan euren ikasketak aurrera eramateko lanak egiten edo izango dituzten azterketetarako ikasten. Hori dela-eta oso garrantzitsua ikusten da eskaintzen diren espazioen baldintzak ikuskatzea egokiak izan daitezen eta bertan beharrezkoa den materiala egon dadin. Era berean, espazio hauen gaineko hausnarketan ikasleen ahotsari bide ematea eta euren eskariak islatzea eta kontuan hartzea aldarrikatzen da. Erabiltzaile nagusi izanda eurek baitakite zein diren behar nagusiak.

- **Garraio publikoan hobekuntza beharrak**

Ikasturtea hasten denetik amaitu arte hainbat bidaia egiten dituzte ikasleek. Batzuetan, gainera, egunero edo egunean bat baino gehiago. Zein eragin du horrek haien bizitzan? Zer suposatzen diote EAEko ikasle bati garraio-kostuek? Lurralde arteko desorekak hainbatetan salatu izan dira, baita ordutegi eta ibilbide aldetik eman behar diren hobekuntzen beharra. Garraio publikoaren gainean hausnarketa sakon bat egitea ezinbestekotzat jotzen da mahai gainean jarritako gai ei erantzuna emateko ikasleekin elkarlanean. Besteak beste, garraio txartel bakarraren beharra, hezkuntza zentroetara —bereziki unibertsitateetara— hurbiltzeko loturak hobetzea edo gazteei bideratutako baldintzak hobetzea: prezioa murriztu, bonu bereziak sortu ikasturterako eta horrela ikasten dauden pertsonen deskontu handiagoa lortzeko aukera izatea gazte tarifa arruntarekin alderatuta, eta abar.

- **Ikasteko beken sisteman birpentsatu**

Azken urtean ikasteko beken sistemako baldintzetan aldaketa nabarmenak eman dira eta ikasle mugimenduetatik ardura handiz jaso dira. Ezarritako eraldaketak salatu nahi dira eta hauen aurrean proposamen berriak eskatu. Bide horretan hausnarketarako espazioen sorrera eskatzen da irtenbide partekatuko bat lortzeko. Besteak beste oso garrantzitsua ikusten da etxetik kanpo bizi diren ikasleen baldintzak aztertzea, hobetze-proposamenak egitea eta ikasketak aurrera eramateko laguntzak ematen zaizkiela bermatzea.

- **Ikasketa tasen prezioa**

Egun gazteok bizi dugun egoera sozioekonomikoa dela-eta, ikasketek sortzen dituzten gastuei aurre egitea esfortzu bat izan daiteke. Horregatik tasen prezioaren gainean lanketa egitea eskatzen da eta gazteon ahotsa kontuan izatea ere. Era berean, ikastek egiteko beharrezkoa den bestelako materiala ere buruan izan behar dira, guztiak baitu eragina.

- **Burokrazia arintzea**

Unibertsitate eta ikastetxeetan informazio asko dago, baina ikasleengana heltzerakoan beti ez da asmatzen. Hori konpontze aldera, burokrazia arintzea proposatzen da, informazioa ikasleen eskura jartzea eta hau benetan hel dadin komunikazio kanalak jartzea. Era berean, aukeren

ezagutza bultzatzea eskatzen da, honela administrazioa ikasleengana hurbiltzea bermatuko baita. Behin gauzak argiago izanda errazagoa baita kasu edo gai bakoitzaren arabera norengana jo behar den jakitea. Azken puntu hau unibertsitatearen ardura dela uste da.

- **Parte-hartze aktiboa sustatzea**

UPV/EHUn eta beste unibertsitate eta ikastetxeetan ikasleen parte-hartze aktiboa sustatzea, erabaki guneeetan euren ahotsak errepresentazioa izatea eta plazaratutako eskari eta proposamenak kontuak izatea.

Horretaz gain, egun honetan egindako aldarrikapenarekin batera ikasleak horrelako egituretan parte-hartzera animatu nahi ditugu. Hauen bitartez euren eskariak bidera ditzakete nahi dituzten aldaketak sortzeko. Era berean, gazteen interesekin bat datorren egitura aurkitzen ez bada elkarte berri bat sortzeko beldurrik ez izatea.

2019-2020 ikasturtera begira, EGK-k Hezkuntza Foroa lantaldean parte hartzeko interesa eta nahia izan dezakeen ikasle elkarte, sindikatu, eragile eta gazte orori deia egiten dio haien proposamenak txertatze aldera eta lantaldearen aniztasuna handitze aldera. Nahi duen edonork hezkuntza@egk.eus helbidera idatzi edo 94 44 36 143 (Irati) zenbakira dei dezake.

Aipatutako gaiak zein proposatzen direnak landuko ditugu ikasturte berrian. Gero eta ahots gehiago izan aberatsagoa izango da lanketa eta EGKren asmoa gai honekin ahalik eta ahots gehien biltzea eta elkartzea da.